

豐縣志

卷八
卷九

人物類上

地 220.35
39
4

豐縣志卷八

人物類上

其屬曰列傳曰列女曰流寓曰仙釋曰技術



夫賢哲克生古今作類列其經世者而叙述之文獻足徵紀載之體備矣其或懿行芳躅卓異而擅名亦有高人女士幽貞而濟美著之列傳所以顯彝教示典型也後有作者攷世而類稽焉鄉有餘師惟景行之不匱耳若夫帝王奮興名標萬世則赫然有國史在

列傳上

漢

豐公姓劉氏名清漢高祖祖也傳三世生太公名端字執

豐縣志

卷八 人物類上

列傳

嘉生四子伯仲邦交前漢書曰春秋晉史蔡墨云陶唐氏既衰其後有劉累學擾龍事孔甲范氏其後也范宣子曰昔句之祖自虞以上為陶唐氏在夏為御龍氏在商為豕韋氏在周封杜伯其子曰溫叔奔晉為士師溫叔生師為王王生成伯缺缺生士會適秦歸晉有子留于秦自為劉氏生明明生遠遠生陽陽十世孫復仕魏為大夫秦滅魏徙梁生清清徙居沛之豐生仁號仁號生端端生高帝

劉仲名喜高祖次兄也初高祖起兵仲侍太公守豐封為宜信侯至七年天下已定封為代王禦邊匈奴攻代仲不能守廢為郟陽侯子濞封為沛侯至淮南王英布反

仲子濞年二十以騎將破布軍於蘄西會荆王劉賈爲布所殺無後上患吳會稽輕悍無壯王以鎮之諸子少乃立濞於沛王三郡五十三城爲吳王

劉交字游高祖同父少弟也好書多材藝少時常與魯穆生白生申公俱受詩浮丘伯高祖旣爲沛公交與蕭曹等俱從高祖攻戰封文信君漢六年旣廢楚王韓信分其地立交爲楚王王薛郡東海彭城三十六縣元王旣至楚以穆生白生申公爲中大夫高后時浮丘伯在長安元王遣子郢客與申公俱卒業文帝時申公始爲詩傳號魯詩元王亦次爲詩傳號曰元王詩元王立二十三年薨宣帝時傳至延壽有異志發覺自殺國除其後

豐縣志

卷八 人物類上

二

列傳

彭城劉氏分爲三里一曰叢亭一曰安上一曰綏輿左將軍劉懷肅居安上里豫州刺史劉懷武居叢亭里宋劉裕帝族居綏輿里並出元王後云其墓在徐州楚王山下

劉信高祖姪伯之子也伯蚤卒高帝微時嘗避事時時與賓客過嫂食嫂厭之佯爲羹盞有聲賓客辭去已而視釜中尚有也高祖由此怨其嫂及爲帝昆弟皆封伯子獨不封上阜屢以爲言高祖曰非忘之也爲其母不長者耳至七年乃封其子信爲羹頡侯

劉賈高祖從兄也漢元年使賈爲將軍定塞地東擊項籍及四年漢王成皋之敗北渡河得張耳韓信軍軍修武

深溝高壘使賈將兵入楚地燒其積聚以破項王軍資已而楚兵擊賈賈堅壁不出與彭越相保五年漢追籍於固陵使賈南渡淮圍壽春復使間招楚大司馬周敷敷反楚佐賈共擊項籍漢王復使賈與太尉盧縮擊臨江王共尉其尉已死以臨江爲南郡漢六年春會諸侯於陳廢楚王信分其地於是以賈爲荆王王淮東五十二城至十一年黥布反賈爲布軍所殺國除

劉澤高祖從祖昆弟也漢二年澤爲郎中十一年澤以將軍擊陳豨得王黃爲營陵侯高后時澤用齊人田生謀事太后得其歡心改封瑯琊王至文帝元年復徙爲燕王益封二千戶

豐縣志

卷八 人物類上

三 列傳

蕭何沛豐人以文無害爲沛主吏掾高祖爲布衣及爲亭長時何數以吏事護高祖高祖起爲沛公何爲丞督事沛公至咸陽何獨先入收秦律令圖書藏之沛公以是具知天下阨塞戶口多少強弱處項羽立沛公爲漢王而三分關中地王秦降將漢王怒欲謀攻羽何諫之曰夫能誑於一人之下而伸於萬乘之上者湯武是也臣願大王王關中養其民以致賢人收用巴蜀還定三秦天下可圖也漢王乃以何爲丞相何進韓信漢王以爲大將軍說漢王引兵東定三秦何留收巴蜀諭告使給軍食漢二年漢王與諸侯擊楚何守關中爲令約束立宗廟社稷宮室縣邑計戶轉運給軍漢王常失軍何常

興關中卒輒補缺上以此專屬任何關中事五年漢王
卽皇帝位以何功最盛先封爲酈侯功臣皆言何徒持
文墨議論不戰顧居臣等上何也上曰諸君知獵乎夫
獵追殺獸者狗也發縱指示獸處者人也今諸君功狗
也至如何功人也羣臣皆莫敢言列侯畢已受封奏位
次上心欲何第一關內侯鄂千秋進曰蕭何萬世功當
第一上乃令何居第一賜帶劍履上殿入朝不趨悉封
何父母兄弟十餘人皆有食邑高祖崩事惠帝何病上
親自臨視何舉曹參以代孝惠二年薨謚曰文終侯

盧綰豐人與高祖同里綰親與高祖太上皇相愛高祖綰
向日生里中持羊酒賀兩家及高祖綰壯學書文又相

豐縣志

卷八

人物類上

四 列傳

愛高祖爲布衣時有吏事避綰宅常隨上下及高祖初
起沛綰以客從入漢爲將軍從東擊項籍以太尉常從
出入臥內衣被飲食賞賜羣臣如蕭曹等亦莫敢望封
爲長信侯綰與劉賈擊臨江王共尉還從擊燕王臧荼
皆平定乃立爲燕王諸侯得幸莫如燕王者綰立六年
以陳豨事見疑上使樊噲擊綰綰悉將其宮人家屬騎
數千居長城下候伺幸上病愈自八謝高祖崩綰遂將
其衆亡入匈奴匈奴以爲東胡盧王居歲餘死胡

周勃豐人以中涓從高祖戰功居多封列侯食絳邑爲人
木彊敦厚不好文學高祖以爲可屬大事又常與呂后
曰安劉氏者必勃也惠帝六年爲太尉高后崩與丞相

陳平等議共誅諸呂迎立代王是爲孝文帝卽位以勃爲右丞相賜金五千斤邑萬戶薨謚曰武侯

周亞夫勃次子爲河內守文帝封爲條侯六年匈奴大入邊以亞夫爲將軍軍細柳帝自勞軍先驅不得入帝使使持節詔之乃開壁門天子徐行至中營亞夫以軍禮見帝改容式車旣出門曰嗟乎此真將軍矣景帝時吳楚反以亞夫爲太尉將兵擊之三月而吳楚破平遷丞相上廢栗太子亞夫固爭之不得上由此疏之竇太后欲封皇后兄王信爲侯亞夫曰高帝約非有功不得侯信無功侯之非約也上默然而沮後匈奴王徐盧五人降漢上欲侯之亞夫曰彼背其主降陛下侯之卽何以責人臣不守節者乎上曰丞相議不可用乃悉封爲侯亞夫因謝病免相後有上變告其子事連汗亞夫召詣廷尉因不食而死

豐縣志

卷八

人物類上

五

列傳

周苛初以客從沛公及入關以苛爲御史大夫楚圍滎陽急漢王遁去使苛守滎陽楚破滎陽生得苛項王爨大鼎于宇下謂苛曰爲我將我以公爲上將軍封三萬戶不從則烹苛嫚罵曰若不趣降漢漢今虜若羽怒指左右摔苛苛奮身蹈鼎而卒後論功封苛子成爲高陽侯周昌苛從弟秦時爲泗水卒吏及高祖起沛從入關破秦以昌爲中尉尋拜御史大夫後破項羽有功封汾陰侯昌強力敢直言自蕭曹等皆卑下之帝欲廢太子而立

戚姬子如意昌力爭之強帝問其說昌為人吃又盛怒曰臣口不能言然臣期期知其不可陛下欲廢太子臣期期不奉詔後如意爲趙王年十歲高祖憂萬歲後不全徙昌爲趙相高祖崩太后鳩殺趙王昌謝病不朝見三歲薨諡曰悼

王吸以中涓從高祖起豐至霸上爲騎郎將入漢以將軍擊項羽功食邑二千二百戶封青陽侯

薛歐以舍人從高祖起豐至霸上爲郎中入漢以將軍擊項羽鍾離昧功食邑四千五百戶封廣平侯國在臨淮唐厲以舍人從高祖起豐爲左司馬入漢以亞將克敵爲東郡都尉擊破籍武城爲漢中尉食邑千戶爲斥侯

豐縣志

卷八 人物類上

六

列傳

陳邀以舍人從高祖起豐入漢以都尉擊項羽有功封爲猗氏侯國屬江東食邑二千四百戶

周聚以隊卒從高祖起豐擊項籍于成臯有功爲將軍布反定吳郡封博陽侯國屬彭城食邑千四百戶

陳倉以中涓從高祖起豐爲騎將入漢以將軍擊項籍後攻盧縮有功封紀信侯食邑七百戶

毛澤以中涓從高祖起豐爲郎將從擊諸侯有功十二年封張節侯郡屬廣平食邑七百戶

朱濞以卒從高祖起豐入漢以都尉擊項羽及燕王臧荼有功封潁川郡鄆陵侯食邑二千七百戶

馮無擇以悼武王郎中兵從高祖起豐攻雍齒擊項籍力

戰奉衛悼武王出滎陽有功封博成侯

陳賀以舍人從高祖起豐後屬韓信擊項羽於固陵有功
爲將軍定會稽浙江封費侯主東海郡

南北朝

劉軌仕齊爲羅州刺史名重當時

隋

劉權字世畧軌之孫有俠氣折節好學動循矩度隋開皇
中以車騎將軍領鄉兵後從晉王廣平陳進授開府儀
同三司宋國公十二年拜蘇州刺史賜爵宋城縣公權
以恩信御下甚得人和煬帝嗣位拜衛尉卿進位銀青
光祿大夫累加金紫光祿大夫大業十一年改爲南海

豐縣志

卷八

人物類上

七

列傳

太守行至九江會羣盜起不得進詔令權討之權招募
一撫諭羣盜悉降帝聞而嘉之及至南海甚有異政數歲
盜起羣雄多願推權爲首權固守以拒之子世徹又齎
密書詣權稱時方擾亂諷令舉兵權召集僚佐對斬其
使矢無異圖以守職卒於官

劉烈權之從叔也美儀容有器局累遷鷹揚大將軍

唐

劉德威烈之子姿貌魁秀有幹畧尚氣節大業末從裴仁
基討淮賊手劍賊酋傳行在入唐授左武侯將軍封滕
縣公詔擊劉武周爲武周所獲使率本部徇地涪州得
自拔歸盡上賊中虛寶唐高祖嘉納貞觀初歷大理卿

綿州刺史政號廉平百姓立石頌德尋檢校益州大都督府長史入爲大理卿太宗問曰比刑網寢密其咎安在德威曰在君不在臣下之寬猛視主之好惡今坐入者無辜出者有罪所以吏務深文非有教使然也帝然其言後遷刑部尚書檢校雍州別駕母喪免旣除爲同州刺史永徽三年卒贈禮部尚書幽州都督謚曰襄陪葬獻陵德威於閨門友睦爲人寬厚平生所得俸祿悉分宗族家無餘蓄云

劉審禮德威長子少喪母爲祖母袁所養袁每疾必親煮藥嘗而後進袁曰兒孝通幽顯吾一顧念疾輒聞素以孝義著聞貞觀中歷左驍衛郎將事繼母尤謹與弟延景及再從皆同居合二百口內外無間言儀鳳三年吐蕃寇涼州審禮戰敗被執一無所屈而死

劉易從德威次子儀鳳三年命審禮率兵十八萬與吐蕃將論欽陵戰于清海審禮被執而死易從往省之比至而審禮已卒易從晝夜號哭不止吐蕃哀其志乃還其尸徒跣萬里扶護以歸見者流涕永昌中封任城縣男累遷彭城長史爲酷吏周興誣搆坐死將刑百姓奔走爭解衣投地曰爲長史祈福有司平直乃十餘萬時稱孝義劉家天下冤之其子昇年十歲配流嶺南後六道使誅流人昇以言語忠信爲首領所保護獲免

劉延嗣德威從孫延嗣爲潤州司馬徐敬業攻潤州延嗣

爲刺史固守俄而城陷敬業邀以降延嗣曰吾世蒙國恩今城不守所負多矣詎能苟生爲宗族羞敬業怒將斬之其黨魏思溫救止繫江都獄敬業敗錄忠當叙以裴炎近親裁遷梓州長史轉汾州刺史

劉商字子夏德威四世孫第進士歷尚書虞部郎中以病免商在大曆中爲十才子之一

劉仁師字行輿德威五世孫商之猶子也長慶二年爲高陵令邾豪猾雪冤枉築新堰通水渠百姓長享其利名其渠曰劉公渠堰曰彭城堰生子皆以劉名尋轉昭應令遷檢校水曹充渠堰副使錫朱章計相愛其能復表爲檢校屯田郎中兼侍御史去後邑人李仕清六十三

豐縣志

卷八 人物類上

九 列傳

人請于朝下其符司錄姚康士曹掾李紹主簿談孺直爲之立遺愛碑

五代

朱珍從梁太祖爲將軍剋立軍制選將練兵甚有法度嘗敗黃巢破秦宗權東并兗鄆勇出諸將先累立戰功拜淄州刺史

楊師厚午溝人從梁太祖累立戰功爲天雄節度使太祖與晉戰河北師厚爲招討使悉領應勁兵朱友珪欲圖之召計事其吏勸勿行師厚曰吾不負梁今雖往無如我何乃朝京師

李筠爲周昭義軍節度使宋太祖卽位遣使加筠中書令

不受卽起兵數帝罪帝遣石守信大破之於潞州筠赴

火死攷宋史筠係太原人今仍舊志存之俟識者攷焉

李守節筠之子守上黨時天下已定帝伐上黨守節降之
特赦為單州團練使累有善政

李光義字匡政早從博士受經隸四門乾元五年禮部鄭
珏下明經及第調陝縣扶溝二縣主簿唐天成元年補
寬旬令歷穎上令兗州錄事府帥李從溫上能狀擢太
子右贊善漢初進朝議大夫

宋

李良弼字夢得光義子舉進士任齊州防禦巡管宿州團
練推官調廬州錄事張齊賢舉材能累遷觀察節度使

豐縣志

卷八 人物類上

十 列傳

李若谷字子淵良弼子少孤依姻家趙况於洛下遂葬其
親于緱氏舉進士補長社縣尉改大理寺丞知宜興縣
累遷為京東轉運使會河決白馬調取芻槩同列盧士
倫刻擾州縣而若谷寬之士倫不悅搆于朝徙知陝州
天聖初判三司戶部勾院罷知荆南王蒙正為駐泊都
監挾太后姻橫肆若谷繩以法監司右蒙正奏徙若谷
潭州洞庭賊數邀商人船殺人輒投屍水中嘗捕獲以
屍無驗每貸死隸他州既逃歸復攻劫若谷擒致之磔
於市自是寇稍息遷集賢殿修撰知滑州尋知延州州
有東西兩城夾河秋夏水溢岸輒圯役費不可勝紀若
谷乃制石版為岸押以巨木後雖暴水不復壞歷知壽

州江寧河南二府改知并州皆有善政進工部侍郎龍
圖閣直學士知開封府事拜參知政事建言風俗媿惡
在上之人作而新之君子小人各有其類今一目以朋
黨恐正人無以自立矣帝悟爲下詔諭中外以耳疾辭
位致仕卒贈太子太傅諡康靖若谷性資端重在政府
論議常近寬厚治民多智慮愷悌愛人其去多見思云
李淑字獻臣若谷子年十二真宗幸亳獻文行在真宗奇
之命賦詩賜童子出身試秘書省校書郎寇準薦之授
校書郎館閣校勘乾興初遷大理評事修真宗實錄爲
檢討官書成改光祿寺丞集賢校理爲國史院編修官
召試賜進士及第改秘書郎進太常丞累遷禮部員外
郎上時政十議改知制誥歷官翰林學士中書舍人端
明侍讀二學士出知河中府卒贈尚書右丞淑警慧過
人博習諸書詳練朝廷典故凡有沿革帝多諮訪制作
誥命爲時所稱嘗修國朝會要二朝訓鑒等書所著別
集百餘卷

李壽朋字延老淑長子慶厯初試學士院賜進士出身爲
鄞縣令尋判吏部南曹使行諸陵奏言昭憲皇后誕育
二聖爲國之母獨以合葬安陵不及時祭請更其禮從
之知鳳翔府滄州滄地震壞城郭帑庾壽朋以席爲屋
督吏完繕葺未數月復其舊括蕪田三萬頃縱民耕擇
其壯者使習兵河方北漏隨塞之故道陞壽朋度必東

潰諭居人徙避後三縣四鎮果墊焉司馬光出使薦其能加直使館入直舍人院同修起居注進戶部鹽鐵副使暴疾卒詔中使撫其孥賜白金三百兩

李復圭字審言淑次子慶厯初與兄同試學士院賜進士出身通判澶州熙寧初進直龍圖閣歷湖北兩浙淮南河東陝西成都六路轉運使在西浙時民以給衙前役多破產復圭悉罷遣歸農令出財助招人民使之瀕海人賴蛤沙地以生豪家量受稅于官而占爲已有復圭奏蠲其稅分以予民在涇州時二稅之入三司移折已重轉運使又復折之復圭爲文奏免民立生祠在潯州時司馬光嘗賦詩以餞之抵州與郡官夜會宴有牙兵

豐縣志

卷八

人物類上

三

列傳

奪銀匠鐵鎚殺人者一府皆驚復圭命捕至立斬之上章待罪諸司按其擅殺仁宗曰復圭帥材也除知慶州邵堯夫稱其臨事敏決有健吏才頗爲時所忌在慶州時爲軍變謫廣濟軍尋謫保靜軍化光軍後以集賢殿修撰知荆南卒

李德芻復圭弟淑之三子也以蔭入官元豐中爲光祿署丞練達故事明解朝章爲無愧于家聲云

李處邁淑之孫靖康中以直秘閣知相州有惠政

李柝親喪廬墓凡二十七年

姚孝錫字仲純政和四年登科調代州兵曹金兵入雁門州將議以城降官屬畏怯投死無所孝錫偃卧大斲略

不爲意金帥就注五臺簿未幾移疾去因家五臺善治
生歲饑出家粟萬石以賑多所全活晚以詩酒自娛自
號醉軒所著有雞肋集

宋汝爲字師禹靖康元年金人犯京師闔門遇害汝爲思
報國家及父兄之讐建炎三年金人再至謁部使者陳
邊事遣對行在高宗嘉納特補修武郎假武功大夫開
州刺史奉國書于粘沒喝以京東運判杜時亮使金時
劉豫節制東平丞相呂頤浩因致書于豫汝爲行刺壽
春遇完顏宗弼軍不克與時亮會獨馳入其壁將上國
書宗弼盛怒刎而縛之欲加僇辱汝爲一無懼色曰死
固不辭然卿命出疆欲達書吐一辭死未晚宗弼顧汝

豐縣志

卷八 人物類上

三

列傳

爲不屈遂解縛延之曰此山東忠義士也命往見豫汝
爲持頤浩書與之開陳禍福勉以忠義使歸朝廷豫拘
留誘以官固辭遣腹心以機密歸報朝廷紹興十三年
亡歸作恢復方畧獻于朝又上丞相書極言用兵之要
秦檜將械送汝爲於金人汝爲乃變姓名爲趙復徒步
入蜀楊企道爲假僧舍居之聞檜死曰除此巨蠹中原
恢復有日矣後竟終於蜀之青城山有忠嘉集行世

宋南強字子居汝爲子因父避秦檜入蜀莫知所之乃徙
於紹興淳祐間知沙縣治專德化不事刑罰民爲立碑
頌德後痛父死非命終日泣涕誓必復讐隆興二年哀
懇于朝時叅知政事虞允文錢端禮以聞高宗特蔭其

子復官南強知雅州政績尤著

王文昌宣和中爲屯田郎中尋貶温州司戶復起爲郎遷浙東節度副使

元

靳良弼字夢臣至元中爲寧陽簿首謁文廟遂慨然曰天下治本自夫子始本之弗敦欲其枝葉茂得乎遂捐俸重修殿廡煥然改觀見李惟明碑記

成野賢爲金鄉令每政暇匹馬一僕循行郊陌勸課農桑刑清事簡民安其業去任民爲之立碑

謝睦歡以賞雄鄉曲間元兵南下轉客兀刺城元太祖攻西夏過其城睦歡與其帥迎降從攻西京睦歡力戰先

豐縣志

卷八 人物類上

古

列傳

登連中三矢仆城下太宗見而憐之命軍校拔其矢縛牛剗其腸裸而納諸牛腹中良久乃蘇誓以死報每遇敵必身先之官至太原路金銀鐵冶達魯花赤子仲溫謝仲溫字君玉豐頤廣顙聲音洪亮略涉書史壬子歲見世祖于野狐嶺命備宿衛凡所行幸必在左右丙辰城上都仲溫爲工部提領董其役帝曰汝但執挺雖百千人寧不懼汝耶已未大軍圍鄂令督諸將時守江軍士乏食仲溫教之罾魚以充軍食帝喜謂侍臣曰朕思不及此一夕帝聞敵軍謹謀命警備仲溫奉繩床帝憑其肩以行至旦不能寐至元九年遷順德路總管時方用兵江淮有寡婦鬻子以償轉輸之直仲溫出俸金贖還之

二十二年爲淮東宣慰使歲旱導白水塘溉民田公私
賴焉大德六年卒年八十孫字完冀寧等路達魯花赤
袁遵道字淑正至大間以神童薦氣剛直性穎悟年十六
能誦五經初爲國學四門館正字陞伴讀歷任河間治
中及致仕授翰林直學士大中大夫年七十四終後以
子貴贈中奉大夫中書叅知政事護軍凡居官行事毅
然不惑而勇于有爲每有異蹟追封汝南郡公謚文靖
袁煥遵道子少遊虞集之門登進士累官國子監祭酒吏
部尚書中書省叅知政事進光祿大夫上柱國太師右
丞相贈魯國公至正末退居華山之陽號友山居士嘗
自贊其相云官高而不知其貴道違而恒自退不時乎
時而心乎憂世虛靈衆同中正獨異惟孜孜于聖學不
知老之將至

豐縣志

卷八

人物類上

十五

列傳

徐克昌初以江西省掾陞城武令持已廉正政尚體要
考課爲諸郡最百姓爲立德政碑後任濟州太守累遷
太常寺禮儀院判今褚庄泰山行宮有元至順庚午克
昌碑記文亦斐然

常能至正間登進士任遼陽路學正鄭鼎亦至正間進士
郭福著至正間任嘉祥縣尹有聲譽

曹中登進士任侍郎有良田百頃城之西南皆屬曹氏今
子孫尚存

李珪至正間任平江路治中子思孝任徽州路推官

王賢舉字相國元太傅越國公椿長子延祐進士任濟甯路總管至正末占籍于豐

明

秦英字子美洪武間知縣曹仲篋薦賢良方正累徵不就李順字彥遠世居邑東北丁蘭里父忠字素裕以謹厚稱順生而勇敢自喜元季兵起歸明爲徐丞相下軍吳元年撥徐州衛左所洪武八年調密雲衛後併歸燕山前衛十二年陞本所總旗十六年陞指揮僉事因衰疾上請命以長子得春代役壽七十九終

李得春順長子洪武十六年代父役隸燕山前衛三十二年以功陞千戶三十四年陞指揮僉事三十五年大戰於小河陣亡

豐縣志

卷八

人物類上

六 列傳

李安得春仲弟得春無子永樂元年以安襲職未幾陞懷遠將軍燕山前衛指揮同知三年授世襲懷遠將軍指揮同知誥命祖父忠父順並贈懷遠將軍同知指揮使司事後北征戰亡於飲馬池亦無子以季弟仲得子貴襲貴歿子廣襲

陳明善博覽羣書端方正直洪武間薦明經累官濟南府知府年九十三卒

唐懋通曉時務練達政體洪武間舉人材任太原府通判陞金華同知

王正字惟仲山陰人隨父賢舉占籍于豐隱居教授洪武

初宋濂薦明經任翰林院孔目陞四川瀘州知州調嘉定州進陞四品俸致仕祀名宦號秋林隱老正長子疇字易之舉懷材抱德任定興縣主簿次子度薦任刑部主事改河間府通判疇子山歲貢任秦府伴讀度子懋字德盛歲貢任瀏陽知縣奉詔分俸養親再任密雲知縣食涿州俸致仕號竹園散人度曾孫煒字汝器歲貢任扶溝縣訓導屹有軌度尤急寒素至假緡以給聘資出廩以相葬具士戴如家人父子及請老歸俸餘物產半散之姪孫輩其爲長者如此

荆貴好學刻苦寒暑無間洪武中由太學生任光祿寺丞陞戶部主事

豐縣志

卷六

人物類上

十七

列傳

趙恕字近仁洪武末由太學生任都察院照磨有丰采陞山西道監察御史

王獻字廷可永樂乙酉舉人任南京兵馬指揮使執正不阿時禁軍盜劫戚里財物獻緝獲法司欲有所原獻抗章竟置于法祀名宦

許彬字道中號養浩其先居碭山麻城村高祖仙徙居豐之釣臺村生信信生成成娶夏邑張氏生仲德卽彬父也元季兵亂時彬八歲仲德携彬走河南播遷者五六載復徙于宛之甯陽白里南河之涯遂占籍焉彬年十七入庠二十二領永樂辛卯鄉薦乙未登進士第選入翰林庶吉士歷任禮部侍郎兼翰林學士壽七十六卒

太常卿劉珣爲之銘曰許出南徐再遷于豐前作後紹慶源斯宏元季兵失聿離桑梓避亂徙宛定居于此

郝敬字允恭正統間歲貢任江西新城訓導郟城教諭通五經工詩字四十妻亡止一子終身不娶年八十五卒

李鑄張祥胡祥孔僅翟成王舜舉李保周興甫侯宗錄秦儀俱豐人正統五年各輸麥千五百石賑饑詔旌爲義民仍命有司表其門曰尚義

李實正統中登進士任滑縣知縣祀名宦見滑縣志

李秉中字德夫成化己丑進士任南京戶部主事署員外郎卒于官

許進字秀升豐之苗城里人也蓋與甯陽之彬同祖者元

豐縣志

卷八

人物類上

六

列傳

末兵亂豐大饑其父就食于靈寶遂爲靈寶人登成化

丙戌進士仕至太子少保禮部尚書卒贈太保謚莊毅

子八人六登仕籍長詔舉人次詩工部尚書次詞知府

次誥戶部尚書謚莊敏次讚吏部尚書文淵閣大學士

謚文簡次論兵部尚書至今族屬尚居苗城里其先隴

在邀帝城寺前先年每自靈寶遣使致祭焉進登成化丙戌進士

舊志載至正末其父携進就食靈寶按至正至成化丙戌已百年豈有百歲登進士之理或其父寄籍靈寶耳

然先隴足據焉能竟以靈寶人沐之

裴紀字克振力村人宏治辛卯舉人任濟南鈞州同知躬

率孝弟勸課農桑凡有爭訟多方開導去後郡人思之

常傑字漢卿宏治間歲貢丰姿秀麗聰穎過人讀書不仕

屢空晏如也

胡甯由歲貢任涪州知州母故廬墓三年復任葭州勸農興學爲一方賢牧從祀鄉賢

李俊號文菴由歲貢初知光化縣敦朴以身化民後知靜海縣剛介不畏強禦時邑人不樂儒業諸生幸以漁爲生俊至多方誘引給之朝夕越三年士風丕振一日以公事出外會母喪計至卽長往不顧吏人檢其宅止俸米數斗而已祀名宦

蔡或初仕開化訓導繼陞泗水教諭捐俸修學楷模多士有山斗之仰從祀鄉賢子岳佐亦明經蜚聲藝苑名重一時遠近從遊者甚衆

豐縣志

卷六

人物類上

十九 列傳

史全字德備宏治乙丑歲貢任濬縣丞專領馬政先時馬不及數民坐追補困公至慨曰養馬在民民困馬何由息卽放歸田里盡力生業期年馬乃大蕃全孫芬號用學萬厯丁丑選貢任壽州訓導沭陽教諭正己率人不尚虛文常俸之外一無所受捐俸修葺啟聖文昌二祠芬子可傳字宗哲萬厯乙未選貢任遂昌縣知縣清慎精勤拮据案牘條畫便宜三載考績以浮言去修先塋建家廟課子弟年旣七十猶與人尺蹠必楷三爵益恭論世者以爲有萬石家風云

鄧旻字克柔襲祖職任湖廣靖州衛指揮剿叛苗有功遷都指揮使時守備榔桂地方宏治十八年奉詔屢受犒

勞正德間流賊至郴桂魚嶺旻遇賊對敵身先士卒被
執罵不絕口遂罹害撫按以聞賜專祠于靖州城西春
秋祀之其次子鄧鑑號西村于城西飛山之麓築臺建
亭于其上額曰思親人稱爲孝子云

于聰永安里人祖海洪武中爲羽林軍出戍新安以戰歿
父興代之永樂中征交趾授百戶再征交趾歿于柳州
聰方九歲聞訃卽知哀慟少長喜閱書史奉母吳氏盡
孝以父死王事襲副千戶洪熙初領屯田蓄水灌田至
今利之宣德中督運軍儲爲諸官最正統癸亥特授武
畧將軍尚書周文襄等恒委以重任蓋知其有異材也
居鄉善治生產累積鉅萬屢散以贍困乏部卒無室者

豐縣志

卷八

人物類上

三

列傳

爲之婚娶以數百人嘗活凍餒之嬰訪還其家喜延賓
客尤敬重名士刑部主事李太左遷衛經歷而死聰具
衣棺厚贈俾還其家歛庠江左與子明友善死而貧聰
許以孫女妻其子其篤行義類若此年八十二卒卒之
日遠近弔者幾三千人

于明聰之子聰嘗遍訪名儒遣明師事以此問學精純韜
畧諳練爲武弁最久之聲聞益著遠近士子皆來就正
門下科第出身者甚衆旌功錄云少保肅愍公子冕無
嗣奉朝命詔以明之子允忠續肅愍公之後程敏政曰
予不及識公識公之子明於吾少保于肅愍公家耳其
言亮哉真有俎豆之習而非純於彙韃者也豈公之教

然助肅愍公社稷臣顧其子京尹君乏嗣乃擇明之子允忠來繼士大夫驩然以爲忠勲之有後宜也然則公之所積將因肅愍公而益顯於後世哉

劉德恩早喪母事父克孝父疾革割股肉爲湯以進父食之愈越二年方卒邑令任惟賢爲捐葬地遷母喪合壙焉結廬哭奠者三年等以毀傷之過卒邑令尹梓爲治棺斂作文祭之先是德恩割股時其妻見其血流不止痛泣驚心而卒

李稠事父以孝聞父病不療于醫乃割股以進父病愈以壽終治喪循禮旣窆倚廬致哀者三年

王佺趙通以縣城改築華山居民里社俱在新城之西距

豐縣志

卷六

人物類上

三 列傳

縣有遠至百里者輸納多不便佺通控籲當事勤瘁十年始獲復還舊址比城復而居民囂然詬爭房宅地基佺通復割已地以息衆心時多義之

李瓊字元貴由歲貢任歸安縣丞有善政民歌誦之從祀鄉賢

宗參號果齋由歲貢任江西萬安縣丞廉潔不苟任官數年致政歸行李蕭然

崔輔政號柳亭篤學行由選貢任輝縣丞廉介有才幹屈伸號前溪以博雅稱所著有聖人同歸千道論曾炙人口由貢任樂陵縣丞公務稍暇諷誦不輟

孫榮性孝友父歿撫幼弟靡所不至及長悉以舊業讓焉

迺自創東莊家道益隆成化五年大饑與邑人李楨各出粟千五百石以賑有司上其事詔授宣義郎都御史王瓊聞之欲奏用以年老辭贈紅紗一端百馬圖一幅李東陽有詩贈之卒從祀鄉賢

孫清字守廉以歲貢任浙江烏程龍泉二縣主簿有惠政子宸字時覲亦歲貢任江西德興縣簿

朱舉性樸雅有古君子風嘉靖中河決爲里人貸賦居柳毅坡人稱柳田先生敦賓禮壽九十三卒益津大司馬王遴表其墓

董遵法布衣傲儻有大志事繼母以孝聞隆慶二年邑罹河患胥溺城外邑民嗷嗷公赴愬漕撫犯顏極陳災苦

豐縣志

卷八

人物類上

三三 列傳

狀淮撫見其少年秉義嗟賞者久之移文驗實竟具疏蠲租三載後見困息者縲繫獄中折辱百端處之怡然曹可教號字侗恩貢任巢縣訓導爲諸生時屢舉孝悌風概整肅被其教者多則象之善署書得朱仲晦筆

史闕疑字養虛外園內方世味澹然秉鐸武昌嘗助貧生婚卻貧生贄爲申請續食載在碑文視邑篆指江誓心一錢不受及解事日送者數千人子還厚字叔儒歲貢嗜學不倦與弟還直一堂友愛互相砥礪入國朝隱居不仕

楊名字晦夫萬曆壬辰選貢任河南歸德府通判時師相沈公龍江在林下贈以詩曰居官清謹有餘香觀此可

以知其品矣視篆睢州以不徇州要人之請中傷移滇之巨津州卽拂衣歸壽八十四卒

孫寅字時正嘗設義塾引鄉黨子弟共學多所成就子班字序卿官訓導陶情詩酒有自得之趣班之子曰繼志字維則以歲貢補海州訓導陞陝西教諭性篤孝年七十餘依依母側及母亡泣語人曰我所以獲存者賴我母也母終子獨能久乎不踰期而卒厥子尚諒字貞甫邑庠生亦以孝友爲閭鄙所重

周潭字德隱邑諸生性至孝父喪廬墓二年母歿亦如之許松三字玉孤育於祖母祖母嬰危疾百計醫禱竟無裨畢力治喪廬墓二年

豐縣志

卷八

人物類上

三三 列傳

朱景清性純朴善事親服勞承志務得其懽母卒泣踊幾絕負土作墳廬墓二年

田益邑庠生父歿廬墓二年時值黃水泛決原野汪洋獨墓處無恙人以爲孝感所致

劉思禮父病思肉食思禮割股以進病遂愈父故廬墓二年

曹可賢邑庠生希建之子早孤事繼母鄧以孝聞母終廬墓三年

李孝感嫡母病割股以進母病尋愈後生母病危思食肝孝感以紙刀開左脇取肝一葉令妻烹奉母孝感遂不能起邑人共稱其孝而惜其愚

孫述遠父母相繼而亡遠廬墓六年不一窺家園
劉應元澹泊無外慕負郭有隙地種柿樹千章築土室以
居縣令召之不出年八十八無疾而逝

徐明足不履城市逍遙閒遠屢空晏如壽一百七歲

渠澄清字允潔由明經任學博富文藻著有四書易經問
辨錄三餘漫草舊志多所纂修

劉勛隱居城東邑令造請不就人稱東田先生

李春煦字景溫惇重寡言笑有知人之鑒歲貢任常州府
訓導識學士周延儒于寒素所著有豐邑古今考閒中
今古時務十一議等書

董冕字伯池萬曆元年入貢任河南涉縣訓導後江北直

豐縣志

卷八

人物類上

十四 列傳

指李公揀涉人也迺方徐州特候公贈一聯曰五載恩
濡羣彥一錢耻受貧生

張盛治字德甫性至孝竭力奉甘旨與伯兄友愛白首如
一日爲諸生負重名妖人趙古元之變當事欲多所誅

戮邑人洵洵盛治力辨至觸憲怒卒賴以全繇明經選

應天學博歷號姑熟教諭皆有各屢攝邑篆多惠政攝

溧水時有蔭生擊殺其從兄盛治執之蔭生託所知饒

金暮夜怒叱之卒置于法生平磊落多大節見明季紀

綱廢弛常感憤好汲引寒士就學至老不倦所著有枌

榆正續集子逢宸世其業孫起宗逢宸仲子亦能文性

至孝母馬病起宗徒步禱岱宗往返千餘里壬午城陷

以不屈死焉

王尚志性廉介不好名由貢生任常州府訓導陞定陶縣教諭鳳陽府教授子四銘孫樾皆生員

李春光字明麓以明經四任外翰溫厚方潔多士佩德享年八十四凡七與賓筵鄉里稱其長者

朱明經字泗源性醇謹由太學仕霸州幕持已廉靜清白無忝霸素多盜自經營政萑苻屏跡其他惠政甚多有朱邑桐鄉之風任甫半載以微疴乞休霸士大夫王遴輩爲文以贈其行子家卿家棟邑庠生

孫祉遠字鍾台歲貢生浙江慶元縣訓導課士有道嘗助其貧生葬賻慶士德之子有穀昌穀式穀元穀庠生胤

豐縣志

卷八

人物類上

三五 列傳

穀河南經歷

馬遴伯字肖龍恩貢生懷甯縣訓導培植宮墻嘉惠寒士殿元劉若宰出于其門有知人鑑卒于任孫卓鶚庠生王洪業字鍾岳恩貢生任宿州學正謙謹砥躬寬和敷教士風爲之不變

王廷獻號襄明由貢生任湖廣蘄州同知有政聲陞雲南浙江府通判時多用肉刑悉除不用及各行戶供應併蠲之士民感德爲建生祠

孫芳遠字秦陽邑庠生性孝友兄弟七人皆輝映膠庠諸凡差徭門戶遠身任之不以煩諸同氣俾其肆力于學妹氏適楊早寡而婁遠給田二百畝妹氏竟以完節享

高年子丕承孫日熾皆以文行世其家

崔大鵬字南溟恢廓好施予里人蔡病沒京師不能歸爲具棺殮資送還鄉仍代償負二百金任宛平縣丞有循吏名

史文燿字五聚可傳子性孝友讀書深沉以遠大自期受業於句曲張榜盡得其指授崇禎己卯中順天榜辛巳尋卒長轡未騁芳蘭遽凋時論惜之

史萬書字獻彤幼穎異稍長補弟子員試輒高等父喬軒宦遊東粵扶櫬數千里哀毀備至事繼母彭與母宋無異羣從子姓多賴教訓成立如蕭民誣罔代糧州衛人買民地不應差溜淺夫額外幫貼皆身先犯難跋涉控

豐縣志

卷六

人物類上

二十六

列傳

顓地方多賴之子垂憲字遵于天啟年選貢清躬潔操其人如玉沉潛問學與其宗文燿有雙鵬摩雲之譽遭壬午之變人咸以不祿惜之孫應振等五人皆有祖父風

董綵號實亭邑學生食廩六十年捐地三頃爲義田贍養族人壽九十七歲終前縣令劉調羹有句云吾愛公爲天上仙飛來人世一百年蓋謂綵也子曰就號景實亦邑庠生好施藥餌歲饑出粟周賑宗黨多所全活大學士陳名夏贈詩有年少名高玉笋班春風絳帳卽投閒六朝親老欣萊舞萬里嗣馨見羽還之句孫志儒字象三承父景實之志至鬻田以施葯餌師事陳百史及百

史爲冢宰恬然無所干人益重之

李嘉楨字福我性醇朴敦孝友繇邑庠入太學筮仕廣東興甯簿革易澆俗示以禮教會朝觀有巨姓陷疑獄堂官劉忠烈公熙祚欲得楨一言釋其人以其謝千金爲贈楨峻辭之劉愈愛重陞安東衛經歷尋拂衣歸壽七十四卒子三人澳澤澎皆文學敦行云

崔連雲字雲橫邑學生美容止工詩賦古文詞性孝友父南溟官京兆日連雲以省試江舟感夢覺而疾歸至彭城果聞訃南溟歿二弟齊雲際雲爲異母弟延師訓督卽徭賦如蝟不以聞成立分產舉無所私嘗自署同觀道人自達官以迄小兒凡納接者無不得其懽心去明

豐縣志

卷六

人物類上

毛 列傳

末里甲差累連雲蒿日條議當事者著爲令人多便之著有天問閣稿弟際雲以好義聞有庠友周被劫母死非命倉皇不知所爲際雲偶過傷其事捐金殯殮之復有友客遊不能歸際雲資給其妻孥後並爲經紀其喪其懿行有足多者

薛道烱由膠庠入太學磊落好施予藏書甚富張德甫祭文有云其尊祖敬宗則建家廟以奉禴祀其睦族輯衆則勸義田以杜流亡或恤中表之嫠而時捐篋笥或起溝壑之瘠而再捐囷倉觀此可概見云

李秉中居身儉朴有古隱人風晚年累舉鄉飲長子岑性友愛其弟兆莊皆邑庠食貧岑代爲完賦恤其舉火歲

以爲常明末大兵中常爲兆贖長子爲莊置田畝舅氏
曹楚老而無子岑迎養於家叔父執中壬午遇難遺一
女岑撫養皆有恩及笄嫁之皆成禮

崔大倫字五全國學生好讀書博聞強記凡閱子史必詳
其顛末稱文學祭酒見古今考

陳邦瑞嘗置義田三百畝贍給宗族差賦皆自辦不假宗
人手子孫亦能承其家法

渠燁字性曉邑學生磊落不侵然諾父病躬親湯藥彌月
愈猶依依侍側至夜分不寐與孤姪分產悉推讓殷厚
有薛包之風明末議者以蕭邑糧重欲加賦于豐燁力
鳴當事事遂寢

豐縣志

卷六

人物類上

三

列傳

王道克邑學生員有文名和平樂易邑人士皆翕然樂親
之壬午兵變前令劉公託守東門城陷同長子窟薦死
焉

孫枝奕字世百丰標峻美雅嗜琴書壬午城破母氏被執
力救不克與母俱斃

皇甫世明字恒照貌修偉博通經史壬午之變從知縣劉
公光守禦南門并死焉

馬雲路邑庠生性孝友母故雲路俯伏柩前不食者三晝
夜遠近爲之感動父歿哀毀之容見者色變一時稱其
孝行焉壬午城陷與子允升俱遇害

李連壬午城陷與父之彥同被執連見彥困乃大號泣因

以頭觸執之彥者父子並遇害弟光星亦死之

張弓字規侯邑學生父故時值兵荒多聞風驚遁弓不爲
懾堅志廬墓掬土成墳縣侯譙旌其門著有詩文二卷
鞏璜字振玉當歲歉時百姓逃匿闔縣漕逋捐貲相助入
感其德前撫院史有匾旌曰年高德邁

張大邦字邦楨性慧嗜學爲文千言立就母陸氏家政嚴
肅邦順意承顏友愛諸弟內外雍睦淮徐兵憲以五世
同居表之弟羽字所有排難解紛有豪士風

黃慎行邑庠生魁壘開霽撫孤卹姻有長者之風

董漢儒字策三拔貢生任濟甯學教諭性方正不畏強禦
好義疎財所交遊多名士著有去菴草尤善制藝楊維

豐縣志

卷六

人物類上

二十九 列傳

斗陳百史爲之序

張逢宸字觀生盛治仲子幼治舉子業試輒冠軍詩歌古
文力追前哲尤長於真草書蒼勁之中姿媚躍出性曠
達不治家人生業游戲筆墨恬然自適以明經司鐸廬
江因海上亂掛冠而歸纂修邑乘多出其手

孫操字雅持邑庠生父燦當歲饑時家有麥三百石商持
厚直請糴不可盡散給鄉里之貧乏者操慷慨好施有
父風明季盜起戮力守陴竟以身殉崑山徐元文誌其
墓子學海有碩望詳本傳

張劍字又華邑廩生性儉朴不修邊幅體貌魁梧博學有
膽畧壬午殉城名列與難帙中子應詔幼孤長而痛父

之志念母之節嗜學不懈成名武闈事母曲意承顏鄉黨以孝稱之

董令矩由例貢任前鴻臚寺少卿 鼎革後足不入城市坐臥花園以自娛年七十三卒

劉本灝邑文學讀書不逐時趨明末見時事日非遂不就試教授生徒以詩文自娛所著甚富

丁鳳鳴邑庠生伯父遺產頗厚臨財不私次第分贍務懽眾心明季學使歲校不就試

程士選號雪門歲貢生隱居不仕嗜學好潔晚年破產爲其從子代完逋負意恬如也

王之光字用賓先庠生明季中州寇亂光投筆從戎職列

豐縣志

卷六

人物類上

三 列傳

副總 國朝來家居不仕騎蹇郊遊以林麓自樂

